



FJÖLBRAUTASKÓLI
VESTURLANDS

Annáll haustannar 2014

Fjölbrautaskóli Vesturlands var settur föstudaginn 22. ágúst. Þá fengu nemendur afhentar stundaskrár. Regluleg kennsla hófst svo mánudaginn 25. ágúst. Síðasti kennsludagur á önninni var 2. desember. Önninni lýkur þegar skólameistari slítur þessari samkomu og þeir 85 nemendur sem nú ljúka námi hafa verið brautskráðir frá skólanum.

Í upphafi annar voru 586 nemendur skráðir í skólann. Þetta er svipaður fjöldi nemenda og á haustönn 2013. Fullorðnir nemendur er stór hluti okkar nemenda, 90 nemendur eða um 15% nemenda við skólann stunda svokallað dreifnám, það er þeir stunda nám utan hefðbundins dagvinnutíma. Þessir nemendur stunda nám á sjúkraliðabraut, í húsasmíði og í vélvirkjun. Í haust hófu 8 grunnskólanemendur nám í ENS103 eða STÆ103. Þetta er tilraunarverkefni þar sem ekki var um fjárnám að ræða heldur voru þessir áfangar kenndir á þeim tíma sem nemendur gátu mætt í stóran hluta kennslustunda.

Á önninni hættu 14 nemendur í skólanum. Auk þess hættu margir í áföngum meðal annars vegna mikilla fjarvista. Þetta brottfall var um 4,5 % sem er svipað og á síðustu haustönn. Þótt okkur þyki þetta of mikið er þetta frekar lítið samanborið við aðra framhaldsskóla.

Eftirfarandi breytingar urðu á starfslíði skólans á önninni: Atli Harðarson skólameistari lét af störfum í september á þessu ári. Jens B. Baldursson aðstoðarskólameistari er í námsleyfi skólaárið 2014 - 2015. Hafdís Fjóra Ásgeirsdóttir var ráðin aðstoðarskólameistari frá 1. ágúst síðastliðnum, hún var síðan settur skólameistari frá 15. september til 1. janúar. Starf skólameistara var auglýst til umsóknar í byrjun september en ekki hefur frést af ráðningu nýs skólameistara ennþá. Dröfn Viðarsdóttir var ráðin aðstoðarskólameistari til áramóta.

Flemming Madsen kennari í rafiðngreinum er í leyfi á haustönn 2014. Þorbjörg Ragnarsdóttir kennari í raungreinum kom úr námsorlofi í haust og Margrét Þóra Jónsdóttir líffræðikennari kom til baka úr barneignarleyfi. Guðrún Vala Elísdóttir kenndi einn áfanga í afleysingum nú á haustönn en það gerði einnig Hörður Ó. Helgason fyrrverandi skólameistari. Sigurbjörg Eðvarðsdóttir var ráðin frönskukennari í hálfstarf á þessari önn. Jóhanna Ólafsdóttir sem kennt hefur sérgreinar sjúkraliða lætur af störfum núna um áramót og Jóhanna Hálfðánsdóttir lét af störfum við skólann í nú í haust, við þökkum þeim fyrir þeirra störf. Marta Dögg Pálmadóttir er í leyfi skólaárið 2014 - 2015. Margrét Þorvaldsdóttir og Þuríður Elfa Jónsdóttir voru ráðnar til kennslu á starfsbraut. Guðrún Lind Gísladóttir fjármálastjóri fór í barneignarleyfi í nóvember og var Kári Haraldsson ráðinn í hennar stað.

Í byrjun þessarar annar tók Jónína Víglundsdóttir við starfi skólahjúkrunarfræðings. Hún er í 50% starfshlutfalli sem skólahjúkrunarfræðingur. Um er að ræða tilraunaverkefni til eins ár og er það unnið í samstarfi við Heilbrigðisstofnun Vesturlands.

Í apríl á þessu ári voru kosningar nemendafélagsins. Þá var Þorsteinn Bjarki Pétursson kjörinn formaður og með honum í stjórn eru Bergþóra Ingbórsdóttir, Elínborg Egilsdóttir, Heiðmar Eyjólfsson og Sindri Snær Alfreðsson. Síðan bættist fulltrúi nýnema í hópinn í ágúst en það er Björn Ingi Bjarnason.

Adda Malín Vilhjálmisdóttir og Margrét Helga Isaksen voru kosnar stjórnendur Góðgerðafélagsins Eynis og einnig stjórnendur íþróttaklúbbs. Þorri Líndal Guðnason var kosinn



FJÖLBRAUTASKÓLI
VESTURLANDS

stjórnandi ljósmyndaklúbbs, Heiðmar Eyjólfsson, Helgi Sigurðsson og Sindri Snær Alfreðsson eru stjórnendur tónlistarklúbbs og viskuklúbbum stjórna þeir Elmar Gísli Gíslason og Magnús Gunnarsson.

Það má segja að skólastarf haustannar hafi verið með hefðbundnum hætti. Við byrjuðum á hefðbundnum nýnemadegi, ferð í Fannahlíð og Langasandssprelli.

Á afmæli skólans 12. september fengum við Sigríði Dögg Arnardóttur kynfræðing til að vera með fyrirlestur fyrir nemendur á sal.

Nokkuð var um ferðalög nemenda. Nemendur starfsbrautar fóru í útivistarferð í Skorradal þar sem gist var og farið í gönguferðir. Hópur nemenda fór í námsferð til Berlínar í október undir leiðsögn Kristínar Kötterheinrich þýskukennara. Þetta var nýr áfangi þar sem nemendur undirbjuggu ferðina, kynntu sér sögu og menningu borgarinnar og fóru síðan til Berlínar. Nemendurnir söfnuðu fyrir hluta ferðarinnar með ýmsum uppákomum, þau seldu meðal annars hafragraut á morgnana og héldu bingó.

Við tókum þátt í átakinu „Hjólum í skólann“ í september og urðum þar í öðru sæti.

West Side var haldið á Akranesi þetta árið en þar hittast nemendur úr framhaldsskólunum á Vesturlandi. West Side byrjaði á íþróttamóti síðan tók við spurningakeppni og dansleikur um kvöldið. Þess má geta að við unnum þetta mót í bráðabana.

Ýmislegt fleira gerðist á önninni; haldnir voru dansleikir, kaffihúsakvöld og fleiri samkomur nemenda. Á síðasta kaffihúsakvöldi nemendafélagsins var frumsýndur fyrsti þáttur af „Skutlunni“ sem er skemmtipáttur gerður af nemendum skólans. Skammhlaup fór fram í október en það er keppni þar sem öllum nemendum skólans er skipt í 8 lið sem keppa innbyrðis. Það voru að venju útskriftarnemar sem voru liðstjórar og stjórnðu þau sínu fólki af röggsemi. Það var bláa liðið sem vann nauman sigur í þetta skipti. Starfsbrautin hélt kaffihúsakvöld þar sem spilað var bingó auk þess sem gestir gátu keypt veitingar og hlýtt á afrakstur nemenda í tónlistarvali. Á næstsíðasta kennsludegi annarinnar var jólaþema þar sem nemendur og kennarar mættu í jólaþeysum, með jólasveinahúfur eða annað sem minnti á jólin.

Ég óska ykkur sem útskrifist frá skólanum til hamingju með þann áfanga sem þið hafið náð. Þið megið vera stolt af að hafa lokið námi við Fjölbrautaskóla Vesturlands og við sem hér störfum erum stolt af ykkur.

Dröfn Viðarsdóttir